

Uunga siunnersuut: Pisortanit ikiorsiissutit pillugit Inatsisartut peqqussutaata allanngortinneqarnera pillugu Inatsisartut peqqussutaat nr. xx, xx 2010-meersoq
(Isumaginninnermut Naalakkersuisoq)

Saqqummiussissut

(Isumaginninnermut Naalakkersuisoq)

Siullermeerneqarnera

Naalakkersuisut matumuuna pisortanit ikiorsiissutit pillugit Inatsisartut peqqussutaata allanngortinneqarnera pillugu Inatsisartut peqqussutissaattut siunnersuut saqqummiuppaat.

Allannguutissatut siunnersuutikkut matumuuna siunertaavoq 2007-imi ukiakkut ataatsimiinnermi immikkoortoq 123-mut inatsisartut aalajangiinerata malinneqarnissaa, tassanimi Naalakkersuisut peqquneqarmata pisortanit ikiorsiissutit pillugit Inatsisartut peqqussutaat nr. 15, 20. november 2006-imeersup allanngortinneqarnissaanut siunnersuummik saqqummiusseqqullugit, taamaalilluni kommunit toqusup illerfiata angallanneqarneranut aningaasartuutinik akiliussinissamut periarfissinneqassammata. Allannguutissatut siunnersuutikkut matumuuna siunertaavortaaq § 8-mi immikkoortoq 1-ip kalaallisut danskisullu oqaasertaasa imminnut naapertuutilernissaat qulakkiissallugu.

Ilaqtariinnermut Ataatsimiititaliap 2007-imi ukiakkut ataatsimiinnermi isumaliutissiisummini oqaatigaa toqusup illerfianik angallassinermut kommunit tapiissuteqartarnerat innunut pisortanit ikiorsiissutit pillugit malittarisassat malillugit ikiorneqarsinnaasunut tunngatitaasariaqartoq. Taamaalilluni Ilaqtariinnermut Ataatsimiititaliap oqaatigaa pisortanit ikiorsiissutinik tigusaqarnissamut piumasaqaatit naammassineqarsimassasut, toqusup illerfianik angallasserup akilerneqarnissaanut tapiiffigineqarsinnaassagaanni.

Ilaqtariinnermut Ataatsimiititaliap isumaliutissiisummini oqaatigaattaaq malittarisassiortoqartariaqartoq sapinngisamik annertunerpaamik kommunini tamakkununnga tunngasut assigiimmik suliarineqartalerniassammata, allanngortitsinikkullu nunap karsianut aningaasatigut nammagassiisoqarani.

Kommunip angerlarsimaffigisap avataani najugaqarfimmiit toqusup illerfianik angerlaassineq siusinnerusukkut pisortanit ikiorsiissutit pillugit Inatsisartut peqqussutaat ukiuni 1982-imiit 2007-imut atuuttoq malillugu ataasiakkaanut naliliisarneq malillugu kommuninit akilerneqartarsimavoq. Pisortanit ikiorsiissutit pillugit peqqussutip atuuttup 2007-imi atuutilersinneqarneratigut taamaaliornissamut inatsisatigut tunngavissaaruppoq.

Siunnersuut manna aningaasaqarnermut tunngatillugu sunniuteqassanngilaq, tassami Inatsisartut peqqussutaata atuuttup atuutilersinneqarneranut atatillugu kommunit ileqqaaruteqarsimasinnaanerannik aningaasaqarnermut tunngatillugu naatsorsuusiortoqarsimangimmat.

Nuannersuuvoq siunnersuutikkut matumuuna ajornartorsiornermi pissutsillu attortinnartut pineranni ikiorsiisoqarsinnaalissammat, tassa inuit angerlarsimaffigisamik avataanni toqutillugit kissaatigineqartillugulu pineqartup angerlarsimaffigisamini ilineqarnissaa.

Taamatut oqaaseqarlunga siunnersuutip akuersaarneqarnissaa Inatsisartunut inassutigaa.